

PREDNACRT

**ZAKON O UDRUŽENJIMA I FONDACIJAMA BRČKO DISTRIKTA
BOSNE I HERCEGOVINE**

Brčko, maj 2020. godine

Na osnovu člana 22. Statuta Brčko distrikta Bosne i Hercegovine (“Službeni glasnik Brčko distrikta Bosne i Hercegovine” broj: 2/10– prečišćeni tekst), Skupština Brčko distrikta Bosne i Hercegovine, na sjednici održanoj dana _____2020. godine, usvaja

ZAKON O UDRUŽENJIMA I FONDACIJAMA BRČKO DISTRIKTA BOSNE I HERCEGOVINE

DIO PRVI - OPŠTE ODREDBE

Član 1. (Predmet zakona)

(1) Ovim zakonom propisuje se: osnivanje, organi i pravni položaj udruženja i fondacije, registracija, statusne promjene, imovina, finansiranje, prestanak rada i brisanje iz registra, te druga pitanja od značaja za rad udruženja i fondacije koji se registruju u Brčko distriktu Bosne i Hercegovine (u daljem tekstu: Distrikt).

(2) Ovim zakonom se uređuje i uspostavljanje kancelarije ili podružnice stranog ili međunarodnog udruženja ili fondacije.

(3) Ovaj zakon se primjenjuje na osnivanje saveza udruženja i fondacija u kojima se interesi udruženja i fondacija povezuju na nivou Distrikta ako posebnim zakonom nije drugačije propisano.

Član 2. (Definicije)

a) **budžetski korisnik** ima značenje kako je definisano Zakonom o budžetu Brčko distrikta Bosne i Hercegovine.

b) **bliski srodnik** je bračni ili vanbračni partner, srodnik po krvi u pravoj liniji, usvojitelj ili usvojenik, srodnik u pobočnoj liniji do trećeg stepena srodstva, srodnik po tazbini do drugog stepena srodstva.

d) **javni interes** je interes koji je kao takav propisan zakonom ili utvrđen odlukom Skupštine.

e) **projekat ili program od javnog interesa** je projekat odnosno program kako je definisan Zakonom o budžetu Brčko distrikta Bosne i Hercegovine.

f) **registar** je baza podataka koju vodi nadležni registarski sud i definisan je Zakonom o registraciji poslovnih subjekata u Brčko distriktu Bosne i Hercegovine.

Član 3. **(Obavljanje privredne djelatnosti)**

(1) Udruženje i fondacija mogu obavljati srodne privredne djelatnosti samo ako je osnovna svrha takve djelatnosti ostvarivanje ciljeva utvrđenih statutom udruženja i fondacije.

(2) Udruženje i fondacija mogu obavljati nesrodne privredne djelatnosti koje nisu neposredno povezane sa ostvarivanjem osnovnih ciljeva utvrđenih statutom udruženja i fondacije samo preko posebno osnovanog pravnog lica.

(3) Dobit koju udruženje i fondacija ostvari obavljanjem privredne djelatnosti iz ovog člana može se upotrijebiti samo za ostvarivanje ciljeva utvrđenih statutom udruženja i fondacije.

(4) Nije dozvoljeno sticanje dobiti ili bilo koje druge materijalne koristi ostvarene iz djelatnosti udruženja i fondacije:

- a) osnivačima;
- b) članovima udruženja;
- c) članovima upravljačkih organa;
- d) licima ovlaštenim za zastupanje;
- e) zaposlenicima;
- f) donatorima; ili
- g) bliskim srođnicima.

(5) Ograničenja iz stava (4) ovog člana se ne odnose na plate, naknade za rad ili naknade troškova licima nabrojenim u stavu (4) ovog člana, a u vezi sa ostvarivanjem ciljeva utvrđenih statutom udruženja ili fondacije.

Član 4. **(Vršenje javnih ovlaštenja)**

Udruženju i fondaciji se može posebnim zakonom povjeriti vršenje određenih javnih ovlaštenja.

Član 5. **(Ciljevi)**

(1) Ciljevi i aktivnosti udruženja i fondacije ne mogu uključivati angažovanje u predizbornoj kampanji, prikupljanju sredstava za političke kandidate ili političke stranke, finansiranje i promovisanje političkih kandidata ili političkih stranaka.

(2) Udruženje i fondacija samostalno utvrđuju ciljeve i djelatnosti u skladu sa Ustavom Bosne i Hercegovine, zakonima Bosne i Hercegovine, te Statutom i zakonima Distrikta.

(3) Ciljevi i djelatnosti udruženja i fondacija ne mogu biti usmjereni na:

- a) rušenje ustavnog poretka Bosne i Hercegovine;
- b) kršenje zagarantovanih ljudskih prava;
- c) izazivanje i poticanje mržnje, netrpeljivosti ili neravnopravnosti, zasnovane na rasnoj, nacionalnoj, vjerskoj ili drugoj pripadnosti ili opredeljenju.

(4) Fizička lica koja su državljani Bosne i Hercegovine i stranci koji imaju boravak na teritoriji Bosne i Hercegovine duže od jedne godine i pravna lica koja su registrovana u Bosni i Hercegovini, mogu osnivati udruženja i fondacije u skladu sa Ustavom Bosne i Hercegovine, zakonima Bosne i Hercegovine, te Statutom i zakonima Distrikta.

Član 6. **(Naziv i znak)**

(1) Svako registrovano udruženje i fondacija ima svoj puni naziv koji sadrži oznaku udruženje, odnosno fondacija.

(2) Udruženje i fondacija u obavljanju svoje djelatnosti može upotrebljavati isključivo svoj registrovani naziv.

(3) Uz svoj puni naziv udruženje i fondacija ima i skraćeni naziv koji sadrži karakteristični dio punog naziva udruženja i fondacije.

(4) Naziv registrovanog udruženja i fondacije mora biti na latiničnom ili ćirilichnom pismu, koji se upisuje u registar na jednom od tri službena jezika u upotrebi u Bosni i Hercegovini.

(5) Naziv udruženja i fondacije može sadržavati strane riječi ako one čine ime međunarodne organizacije čije je udruženje i fondacija članica, ako su te riječi uobičajeno u upotrebi u Bosni i Hercegovini, ako za njih ne postoji odgovarajući prevod, ili ako se radi o riječima na mrtvom jeziku.

(6) Udruženje i fondacija može imati svoj znak.

(7) Naziv, skraćeni naziv i znak udruženja i fondacije moraju se jasno razlikovati od naziva i znaka drugih registrovanih udruženja i fondacija.

(8) Naziv, skraćeni naziv i znak udruženja i fondacije ne mogu da sadrže riječi, znakove ili simbole koji su protivni zakonu ili javnom moralu ili koji vrijeđaju nacionalna, religijska ili druga osjećanja javnosti.

(9) U naziv udruženja i fondacije može se unijeti ime ili dio imena nekog fizičkog lica uz njegovu saglasnost, a ako je lice umrlo, uz saglasnost nasljednika.

(10) U pogledu pitanja koja se odnose na naziv udruženja i fondacije, a nisu regulisana ovim Zakonom, primjenjuju se odredbe Zakona o preduzećima Brčko distrikta Bosne i Hercegovine.

Član 7. **(Javnost rada)**

Rad udruženja i fondacije je javan i transparentan.

Član 8.
(Obaveza postupanja saglasno odredbama statuta)

Udruženje odnosno fondacija obavezno je postupati saglasno odredbama statuta udruženja i fondacije.

Član 9.
(Sjedište i djelatnosti izvan sjedišta)

- (1) Udruženje i fondacija imaju sjedište.
- (2) Sjedište udruženja ili fondacije ne može biti na adresi stambene jedinice u privatnom vlasništvu, osim ukoliko udruženje i fondacija istu koristi isključivo.
- (3) Ukoliko je sjedište udruženja ili fondacije zajedničko sa drugim pravnim licem, udruženje ili fondacija dužni su odvojeno evidentirati troškove i dati na uvid iste nadležnoj inspekciji.
- (4) Sjedište udruženja ili fondacije ne može biti na adresi nepokretnosti u svojini Distrikta, osim uz odobrenje nadležnog organa Distrikta.
- (5) Na adresi sjedišta udruženja ili fondacije mora biti istaknut naziv udruženje ili fondacije na vidljivom mjestu.
- (6) Udruženje i fondacija mogu uspostaviti kancelarije i podružnice izvan sjedišta, u skladu sa statutom udruženja i fondacije.

Član 10.
(Sticanje svojstva pravnog lica)

Udruženje i fondacija stiče svojstvo pravnog lica upisom u registar.

DIO DRUGI – UDRUŽENJE I FONDACIJA

POGLAVLJE I – UDRUŽENJE

Član 11.
(Udruženje)

Udruženje u smislu ovog zakona je svaki oblik dobrovoljnog povezivanja tri ili više fizičkih ili pravnih lica, u svim kombinacijama, radi ostvarivanja i unapređenja određenog zajedničkog ili opšteg interesa ili cilja koji nisu u suprotnosti sa Ustavom Bosne i Hercegovine, zakonima Bosne i Hercegovine, te Statutom i zakonima Distrikta, a čija svrha nije sticanje dobiti.

Član 12.
(Osnivačka skupština)

Osnivačka skupština udruženja ima obavezu usvojiti osnivački akt, statut udruženja, i imenovati organe upravljanja u skladu sa ovim zakonom.

Član 13. (Osnivački akt)

(1) Osnivački akt udruženja sadrži:

- a) ime i prezime, odnosno naziv firme, osnivača i njihovo prebivalište, odnosno sjedište;
- b) naziv udruženja, skraćeni naziv i adresu sjedišta udruženja;
- c) ciljeve i djelatnosti udruženja;
- d) ime, prezime i prebivalište lica ovlaštenog za zastupanje udruženja;
- e) potpise osnivača i broj lične karte, ukoliko su osnivači državljani Bosne i Hercegovine, potpis ovlaštenog predstavnika pravnog lica, odnosno broj putne isprave i naziv države koja je izdala putnu ispravu za strane državljane; i
- f) broj i datum osnivačkog akta.

(2) Kada je jedan od osnivača udruženja pravno lice, osnivački akt, u ime tog pravnog lica, potpisuje njegov zastupnik tako što se uz puni naziv pravnog lica navodi ime i prezime zastupnika i pečat pravnog lica.

(3) Osnivači ne mogu biti država Bosna i Hercegovina, entiteti, Distrikt, kantoni, gradovi, opštine, državni organi, državna preduzeća i fondovi, kao ni bilo koja druga državna institucija ili organizacija.

Član 14. (Statut udruženja)

(1) Statut udruženja sadrži:

- a) naziv udruženja, skraćeni naziv i znak udruženja, ukoliko postoji, kao i adresu sjedišta i kancelarija odnosno podružnica udruženja;
- b) ciljeve i djelatnosti udruženja;
- c) postupak pristupanja i isključenja člana;
- d) naziv organa udruženja, način njihovog izbora, uslove i način opoziva, ovlaštenja, kvorum i pravila glasanja, trajanje mandata, uslove i način prestanka rada;
- e) pravila za ostvarivanje, korištenje i raspolaganje sredstvima udruženja, kao i naziv organa odnosno ime i prezime lica ovlaštenog za nadzor nad korištenjem tih sredstava;
- f) način ostvarivanja javnosti rada;
- g) postupak za izmjenu i dopunu statuta, ovlaštenja i način donošenja drugih opštih akata;
- h) opis oblika i sadržaj pečata;
- i) zastupanje udruženja;
- j) uslove i postupak za pripajanje drugom udruženju, spajanje sa drugim udruženjem, kao i uslove i postupak za podjelu ili prestanak rada udruženja;
- k) postupak raspolaganja preostalim imovinom ili drugim sredstvima u slučaju prestanka rada udruženja; i
- l) način podnošenja finansijskog izvještaja i izvještaja o radu.

(2) Statutom se mogu urediti i druga pitanja od značaja za rad udruženja.

Član 15.
(Statusne promjene udruženja)

- (1) Udruženje se može pripojiti, spojiti ili podijeliti.
- (2) Pripajanjem, pripojeno udruženje prestaje postojati i nastavlja sa radom u udruženju kojem se pripaja.
- (3) Spajanje je osnivanje novog udruženja na koje prelazi cjelokupna imovina dva ili više udruženja koja se spajaju.
- (4) Spajanjem, udruženja koja se spajaju u novo udruženje, prestaju da postoje, a na postupak registracije novonastalog udruženja primjenjuju se odredbe ovog zakona koje se odnose na osnivanje udruženja.
- (5) Udruženje se može podijeliti na dva ili više udruženja.
- (6) Podijeljeno udruženje iz stava (5) ovog člana prestaje da postoji, a na postupak registracije novonastalih udruženja primjenjuju se odredbe ovog zakona koje se odnose na osnivanje udruženja.

Član 16.
(Članstvo)

- (1) Udruženje utvrđuje sopstvene kriterije za prijem u članstvo.
- (2) Kriteriji za prijem u članstvo iz stava (1) ovog člana podliježu samo ograničenjima u smislu zabrane diskriminacije kako je utvrđena Ustavom Bosne i Hercegovine, zakonima Bosne i Hercegovine, te Statutom i zakonima Distrikta.
- (3) Udruženje je dužno voditi spisak članova.
- (4) Spisak članova udruženja sadrži:
 - a) ime, prezime, odnosno naziv/firma člana sa adresom prebivališta, odnosno sjedišta;
 - b) datum pristupanja i broj pristupnice;
 - c) vrstu prava glasa na skupštini udruženja, u skladu sa statutom udruženja i fondacije; i
 - d) datum prestanka članstva.
- (5) Spisak članova udruženja je dostupan nadležnim organima na njihov zahtjev, u zakonom propisanom postupku.
- (6) Maloljetna lica mogu biti članovi udruženja i učestvovati kao članovi u radu udruženja, uz saglasnost zakonskog zastupnika, odnosno staratelja, u skladu sa statutom udruženja i fondacije.

Član 17.
(Organi udruženja)

- (1) Udruženje mora imati skupštinu i lice ovlašteno za zastupanje.
- (2) Svi članovi udruženja su članovi skupštine sa jednakim pravom glasa, ukoliko statutom udruženja nije drugačije propisano.
- (3) Udruženje može imati upravni odbor i druge organe.

Član 18.
(Akti i organi stranog ili međunarodnog udruženje)

Za registraciju stranog ili međunarodnog udruženja dovoljno je da ima akte i organe, bez obzira kako su nazvani, koji ispunjavaju uslove propisane ovim zakonom.

Član 19.
(Nadležnost Skupštine)

Skupština, je nadležna za:

- a) usvajanje statuta, izmjene i dopune statuta i drugih akata određenih statutom;
- b) odlučivanje o pripajanju, spajanju, podjeli i prestanku rada;
- c) osnivanje drugih pravnih lica, njihovom obliku organizovanja i djelatnosti, saglasno ovom zakonu;
- d) imenovanje i razrješenje lica ovlaštenog za zastupanje, članova upravnog odbora i drugih organa udruženja, predviđenih statutom;
- e) usvajanje godišnjih ili periodičnih izvještaja o radu udruženja, finansijskih izvještaja i izvještaja o radu; i
- f) odlučivanje o svim drugim pitanjima koja nisu u nadležnosti drugih organa udruženja.

Član 20.
(Upravni odbor odnosno lice ovlašteno za zastupanje)

Upravni odbor odnosno lice ovlašteno za zastupanje udruženja, ako statutom udruženja nije predviđeno postojanje upravnog odbora:

- a) priprema sjednice skupštine;
- b) priprema nacrt statuta, izmjena i dopuna statuta i drugih akata koje donosi skupština;
- c) provodi politiku, zaključke i druge odluke koje je donijela skupština;
- d) upravlja sredstvima udruženja;
- e) priprema i podnosi godišnji ili periodični izvještaj o radu udruženja, finansijski izvještaj skupštini na usvajanje; i
- f) obavlja i druge poslove određene statutom.

Član 21.
(Izuzete od glasanja)

Osnivači, članovi udruženja, članovi organa udruženja, lica ovlaštena za zastupanje i zaposlenici dužni su prijaviti, kako sopstveni tako i finansijski i drugi interes bliskih srodnika u bilo kojoj aktivnosti udruženja i dužni su uzdržati se od odlučivanja po takvim pitanjima.

POGLAVLJE II – FONDACIJA

Član 22.
(Osnivanje fondacije)

(1) Fondacija je pravno lice koje nema svoje članstvo, a osnovana je od jednog ili više fizičkih ili pravnih lica, čija je svrha upravljanje određenom imovinom u opštem interesu ili u humanitarne svrhe.

(2) Fondacija može biti osnovana jednostranom izjavom volje, ugovorom, testamentom, legatom ili drugim odgovarajućim pravnim aktom, ukoliko sadrže podatke neophodne za osnivanje i upis fondacije u registar.

(3) Fondacija ima osnivački akt i statut.

(4) Fondacija ima upravni odbor.

(5) Za registraciju strane ili međunarodne fondacije dovoljno je da ima akte i organe bez obzira kako su nazvani, koji ispunjavaju uslove propisane ovim zakonom.

(6) Osnivači ne mogu biti država Bosna i Hercegovina, entiteti, Distrikt, kantoni, gradovi, opštine, državni organi, državna preduzeća i fondovi, kao ni bilo koja druga državna institucija ili organizacija.

(7) Fondacija može uspostaviti kancelarije i podružnice, u skladu sa statutom.

Član 23.
(Osnivački akt)

(1) Osnivački akt fondacije sadrži:

- a) ime i prezime, odnosno naziv firme osnivača i adresu prebivališta, odnosno sjedišta, broj lične karte ukoliko su osnivači državljani Bosne i Hercegovine, odnosno broj putne isprave i naziv države koja je izdala putnu ispravu za strane državljane;
- b) potpise osnivača fizičkih lica odnosno potpis ovlaštenog predstavnika osnivača pravnog lica;
- c) naziv i adresu sjedišta fondacije;
- d) svrhu i djelatnosti fondacije;
- e) iznos novčanih sredstava ili drugih oblika imovine kojima fondacija upravlja i raspolaže;

- f) ime, prezime i adresa prebivališta lica ovlaštenog za zastupanje fondacije u postupku upisa u registar;
- g) broj i datum osnivačkog akta.

(2) Kada je jedan od osnivača fondacije pravno lice, osnivački akt, u ime tog pravnog lica, potpisuje njegov zastupnik tako što se uz puni naziv pravnog lica dodaje ime i prezime i potpis zastupnika te pečat pravnog lica.

Član 24. **(Statut fondacije)**

Statut fondacije sadrži:

- a) naziv, skraćeni naziv ukoliko postoji i sjedište fondacije;
- b) način osnivanja fondacije;
- c) svrhu i djelatnosti fondacije;
- d) organe, način njihovog izbora, uslove i način opoziva, ovlaštenja, kvorum i pravila glasanja, lice ovlašteno za sazivanje upravnog odbora, trajanje mandata, uslove i način prestanka rada;
- e) postupak imenovanja privremenih i stalnih članova upravnog odbora u slučaju objektivne i trajne spriječenosti jednog ili više članova da učestvuje u radu upravnog odbora kao i tijelo nadležno za postupak imenovanja;
- f) pravila upravljanja i raspolaganje imovinom fondacije, kao i naziv organa odnosno ime i prezime lica ovlaštenog za nadzor nad upravljanjem tim sredstvima;
- g) moguće korisnike sredstava fondacije;
- h) postupak izmjena i dopuna statuta, kao i ovlaštenje za donošenje i postupak donošenja drugih opštih akata;
- i) uslove i postupak za pripajanje, spajanje i podjelu ili prestanak rada fondacije;
- j) pitanja u vezi sa kojima je kod odlučivanja potreban poseban kvorum ili posebna (kvalifikovana) većina;
- k) kriterije upravljanja i raspolaganja imovinom fondacije u slučaju prestanka rada;
- l) opis oblika i sadržaj pečata i znaka fondacije.

Član 25. **(Statusne promjene fondacije)**

(1) Fondacija se može pripojiti, spojiti ili podijeliti samo sa drugom fondacijom odnosno podijeliti na više fondacija.

(2) Pripajanjem, pripojena fondacija prestaje postojati i nastavlja sa radom u fondaciji kojoj se pripaja.

(3) Spajanje je osnivanje nove fondacije na koju prelazi cjelokupna imovina više fondacija koje se spajaju.

(4) Fondacija koja se spaja prestaje postojati, a na postupak upisa novonastale fondacije primjenjuju se odredbe ovog zakona koje se odnose na osnivanje fondacije.

(5) Fondacija se može podijeliti na dvije ili više fondacija.

(6) Podijeljena fondacija iz stava 5. ovog člana prestaje da postoji, a na postupak upisa novonastalih fondacija primjenjuju se odredbe ovog zakona koje se odnose na osnivanje fondacija.

Član 26. (Organi fondacije)

(1) Organ upravljanja fondacijom je upravni odbor.

(2) Osnivač ili lice ovlašteno od osnivača imenuje upravni odbor.

(3) Statutom se mogu predvidjeti i drugi organi fondacije.

Član 27. (Upravni odbor)

(1) Upravni odbor fondacije je odgovoran za ostvarivanje svrhe i djelatnosti fondacije, a može obavljati i druge poslove utvrđene statutom fondacije i zakonom.

(2) Upravni odbor fondacije ima najmanje tri člana.

(3) Član upravnog odbora ne može biti maloljetno lice, lice zaposleno u fondaciji, te član drugih organa fondacije, ili lice koje vrši nadzor nad radom fondacije.

Član 28. (Nadležnosti upravnog odbora)

Nadležnost upravnog odbora je:

- a) usvajanje statuta, izmjena i dopuna statuta i drugih akata utvrđenih statutom;
- b) ostvarivanje svrhe fondacije utvrđene statutom;
- c) upravljanje i raspolaganje imovinom fondacije;
- d) imenovanje lica ovlaštenih za zastupanje i predstavljanje fondacije;
- e) imenovanje novih privremenih ili stalnih članova upravnog odbora, u slučaju objektivnih okolnosti koje sprečavaju jednog ili više članova da radi u ovom organu, saglasno statutu;
- f) odlučivanje o pripajanju, spajanju, podjeli kao i drugim statusnim promjenama fondacije;
- g) izrada finansijskih i drugih izvještaja; kao i
- h) odlučivanje o svim drugim pitanjima koja nisu u nadležnosti drugih organa fondacije.

Član 29.
(Izuzete od glasanja)

Član organa fondacije ne može glasati u stvarima u kojima njegovi finansijski i drugi interesi ili interesi njegovog bliskog srodnika, mogu biti u suprotnosti sa interesima fondacije.

POGLAVLJE III - REGISTROVANJE UDRUŽENJA I FONDACIJE

Član 30.
(Prijava i registracija)

- (1) Udruženje i fondacija upisuju se u registar.
- (2) Prijava za upis u registar podnosi se Osnovnom sudu Brčko distrikta Bosne i Hercegovine (u daljem tekstu: Osnovni sud).
- (3) Uz prijavu za upis prilaže se:
 - a) osnivački akt;
 - b) statut udruženja odnosno fondacije;
 - c) spisak osnivača i članova organa upravljanja;
 - d) spisak i adresa lica ovlaštenih za zastupanje udruženja, odnosno fondacije u Bosni i Hercegovini;
 - e) znak udruženja, odnosno fondacije, ukoliko postoji.
- (4) Radnje preduzete u vremenu između osnivanja i registracije udruženja mogu stvoriti obaveze samo za lica koja su preduzela te radnje, ukoliko su postupali suprotno datom ovlaštenju.

Član 31.
(Rješenje o upisu u registar)

- (1) Rješenje o upisu u registar koje donosi Osnovni sud sadrži:
 - a) datum upisa;
 - b) registracijski broj pod kojim je izvršen upis;
 - c) naziv, skraćeni naziv ukoliko postoji i adresu sjedišta udruženja odnosno fondacije;
 - d) znak, ako postoji;
 - e) djelatnosti;
 - f) ime, prezime i adresu lica ovlaštenih za zastupanje.
- (2) Rješenje o upisu fondacije u registar, pored elemenata navedenih u stavu (1) ovog člana, sadrži i podatke o iznosu novčanih sredstava koje osnivač unosi.

Član 32.
(Odbacivanje prijave za upis u registar)

(1) Ukoliko u toku postupka registracije Osnovni sud utvrdi, na osnovu prijave i priloženih akata, da udruženje ili fondacija ne ispunjava uslove utvrđene ovim zakonom ili da prijava za registraciju nije potpuna, na to će upozoriti podnosioca prijave navodeći razloge zbog kojih registracija nije izvršena.

(2) Podnosiocu prijave biće omogućeno da ispravi ili dopuni prijavu u roku od 30 dana od dana prijema obavještenja.

(3) Ukoliko podnosilac prijave ne ukloni nedostatke prijave, Osnovni sud će rješenjem odbaciti zahtjev za upis u registar.

Član 33.
(Odbijanje prijave za upis u registar)

(1) U slučaju da Osnovni sud ustanovi da su ciljevi udruženja i fondacije u suprotnosti sa odredbama člana 5. ovog zakona, rješenjem će odbiti prijavu za upis u registar.

(2) U obrazloženju rješenja iz stava (1) ovog člana Osnovni sud navodi razloge za donošenje takvog rješenja.

Član 34.
(Shodna primjena zakona)

Na pitanja koja nisu uređena ovim zakonom, a odnose se na postupak upisa u registar shodno se primjenjuju odredbe Zakona o registraciji poslovnih subjekata u Brčko distriktu Bosne i Hercegovine.

Član 35.
(Izmjene i dopune registracije)

(1) Udruženje odnosno fondacija dužna je podnijeti Osnovnom sudu prijavu za izmjenu registracije u slučaju nastupanja promjene u pogledu podataka relevantnih za upis u registar u roku od 8 dana od dana nastupanja promjene.

(2) Osnovni sud donosi rješenje u po prijavi u skladu sa članom 31. ovog zakona.

Član 36.
(Registracija stranih i međunarodnih udruženja i fondacija)

(1) Odredbe ovog zakona primjenjuju se i na uspostavljanje kancelarije i podružnice stranog ili međunarodnog udruženja ili fondacije, ukoliko nije drugačije propisano zakonom.

(2) Uz zahtjev za upis u registra prilaže se:

- a) dokaz o upisu udruženja ili fondacije u registar u matičnoj zemlji;
- b) akt o uspostavljanju kancelarije ili podružnice u Bosni i Hercegovini;
- c) ime, prezime i adresa lica ovlaštenog za zastupanje udruženja odnosno fondacije u Distriktu;
- d) adresa sjedišta kancelarije ili podružnice u Distriktu.

(3) Ukoliko prema zakonu matične države nije propisan upis udruženja ili fondacije u registar, umjesto rješenja o registraciji u matičnoj državi, uz zahtjev za upis podnosi se druga pismena isprava, ovjerena od nadležnog organa, kojim se dokazuje da udruženje odnosno fondacija ima status pravnog lica u matičnoj državi.

(4) Ukoliko rješenje o upisu u registar u matičnoj državi ne sadrži podatke o statutarnim ciljevima i djelatnostima udruženja, uz zahtjev za upis u registar podnosi se i statut ili drugi akt iz kojeg su vidljivi ciljevi stranog udruženja odnosno fondacije.

POGLAVLJE IV - FINANSIRANJE UDRUŽENJA I FONDACIJE

Član 37. (Finansiranje udruženja i fondacije)

(1) Udruženje i fondacija finansira se iz:

- a) članarine udruženja;
- b) dobrovoljnog priloga i poklona fizičkog i pravnog lica, kako domaćeg tako i stranog u gotovom novcu, uslugama ili imovini bilo koje vrste;
- c) sredstava za finansiranje i sufinansiranje programa i projekata od javnog interesa;
- d) prihoda od kamate, dividende, dobiti, zakupnine, honorara, i drugog sličnog izvora;
- e) prihoda stečenog kroz ostvarenje ciljeva i aktivnosti udruženja i fondacije, kako je određeno statutom.

(2) Udruženje i fondacija raspoložu imovinom u skladu sa statutom udruženja i fondacije i ovim zakonom.

(3) Udruženje i fondacija za obaveze odgovaraju svojom cjelokupnom imovinom.

Član 38. (Upravljanje imovinom)

(1) Organi udruženja i fondacije dužni su upravljati imovinom udruženja i fondacije na odgovoran i zakonit način, u najboljem interesu udruženja i fondacije.

(2) O raspolaganju sredstvima koja udruženje odnosno fondacija dobiju u okviru finansiranja i sufinansiranja programa i projekata od javnog interesa od strane budžetskih korisnika, udruženje i fondacija izvještavaju saglasno ovom zakonu i Zakonu o budžetu Brčko distrikta Bosne i Hercegovine.

Član 39.
(Poslovne knjige i finansijski izvještaj)

(1) Udruženje i fondacija dužni su da uredno vode poslovne knjige u skladu sa međunarodnim računovodstvenim standardima i da sastavljaju finansijske izvještaje u skladu sa ovim zakonom i Zakonom o računovodstvu i reviziji u Brčko distriktu Bosne i Hercegovine.

(2) Finansijski izvještaj iz stava (1) ovog člana udruženje i fondacija podnose nadležnoj organizacionoj jedinici Direkcije za finansije Brčko distrikta Bosne i Hercegovine saglasno rokovima za podnošenje finansijskih izvještaja.

Član 40.
(Nepravilnosti u provođenju statuta)

(1) Ako se utvrde nepravilnosti u provođenju statuta udruženja i fondacije, član ili nadležni organ udruženja i fondacije dužan je poduzeti radnje da se navedene nepravilnosti otklone.

(2) U slučaju postupanja suprotnom odredbama stava (1) ovog člana, odnosno u slučaju nemogućnosti otklanjanja nepravilnosti, član, nadležni organ udruženja i fondacije, odnosno treće lice podnosi prijavu nadležnom Inspektoratu Distrikta.

Član 41.
(Finansiranje, odnosno sufinansiranje projekata od javnog interesa)

(1) Udruženje, odnosno fondacija imaju pravo učestvovanja na javnom pozivu u kojem budžetski korisnici, u smislu Zakona o budžetu Brčko distrikta Bosne i Hercegovine finansiraju odnosno sufinansiraju projekte odnosno programe od javnog interesa, saglasno uslovima propisanim navedenim zakonom.

(2) Udruženje ili fondacija koji dobiju sredstva finansiranja ili sufinansiranja programa odnosno projekata od javnog interesa podnose izvještaj o utrošenim sredstvima budžetskom korisniku saglasno odredbama Zakona o budžetu Brčko distrikta Bosne i Hercegovine, odnosno podzakonskim aktima donesenim na osnovu istog zakona.

DIO TREĆI – NADZOR

POGLAVLJE I - NADZOR NAD RADOM UDRUŽENJA I FONDACIJA

Član 42.
(Nadležnosti inspektora za udruženje i fondaciju)

(1) Nad radom udruženja i fondacija osnovanih u skladu sa ovim zakonom nadzor provodi Inspektorat za poslove nadzora nad primjenom zakona, propisa i opštih akata iz nadležnosti organa i institucija Distrikta.

(2) Nadležni inspektor ima ovlaštenje i obavezu kontrole:

- a) prostorija sjedišta udruženja ili fondacije;
- b) postupanja saglasno ovom zakonu u pogledu prijave izmjena podataka relevantnih za upis u registar, a naročito izmjene i dopune statuta, ciljeva i djelatnosti, statusnih promjena, sjedišta, lica ovlaštenih za zastupanje;
- c) korištenja naziva udruženja ili fondacije saglasno sa nazivom upisanim u registar;
- d) postupanja saglasno ciljevima i svrsi udruženja ili fondacije kako su deklarirani statutom udruženja odnosno fondacije;
- e) obavljanja srodnih ili nesrodnih privrednih djelatnosti u skladu sa ovim zakonom;
- f) održavanja sjednice skupštine udruženja ili upravnog odbora fondacije;
- g) dostavljanja finansijskih izvještaja kako je to propisano ovim zakonom; i
- h) vođenja spiska članova udruženja na način propisan ovim zakonom.

(3) U postupku provođenja nadzora nad radom udruženja i fondacije nadležni inspektor postupa saglasno Zakonu o upravnom postupku Brčko distrikta Bosne i Hercegovine.

(4) Prilikom vršenja svojih ovlaštenja nadležni inspektor preduzima sljedeće mjere:

- a) naređuje otklanjanje utvrđenih nedostataka ili nepravilnosti u određenom roku;
- i
- b) izdaje obavezni prekršajni nalog.

(5) Pored ovlaštenja iz stava (2) i (4) ovog člana nadležni inspektor ima i ostala ovlaštenja predviđena Zakonom o inspekcijama Brčko distrikta Bosne i Hercegovine.

(6) U slučaju sumnje u postojanje elemenata krivičnog djela, nadležni inspektor dužan je, bez odlaganja, a najkasnije u roku od 8 dana, obavijestiti nadležne organe.

Član 43. **(Ostali inspekcijski nadzor)**

Nadzorom nad zakonitošću rada udruženja ili fondacije od strane nadležnog inspektora saglasno odredbama ovog zakona ne zadire u nadležnost inspekcija nadležnih za provođenje kontrole zakonitosti rada udruženja ili fondacije u oblastima koje se tiče privredne ili druge djelatnosti, radnih odnosa, javnog reda i mira, poreskog zakonodavstva i drugih nadležnih inspekcija.

Član 44. **(Nadzor nad provođenjem zakona)**

Nadzor nad provođenjem ovog zakona vrši Odjeljenje za stručne i administrativne poslove Vlade Brčko distrikta Bosne i Hercegovine.

POGLAVLJE II - NADZOR NAD ZAKONITOŠĆU RADA UDRUŽENJA I FONDACIJE KOJIMA JE POVJERENO OBAVLJANJE JAVNIH OVLAŠTENJA

Član 45. (Nadzor nad zakonitošću rada)

Nadzor nad zakonitošću rada udruženja i fondacije kojima je povjereno obavljanje javnih ovlaštenja vrši odjeljenje Vlade Distrikta sa kojeg su prenesena javna ovlaštenja.

Član 46. (Izveštaj o vršenju povjerenih javnih ovlaštenja)

(1) Udruženje i fondacija koji vrše javna ovlaštenja dužni su redovito izvještavati o vršenju prenesenih ovlaštenja, a najmanje jednom tromjesečno.

(2) Organ nadležan za nadzor dužan je najmanje jednom godišnje preispitati opravdanost eventualnog prenosa ovlaštenja i o tome izvjestiti Vladu.

Član 47. (Prijava nepravilanosti)

(1) Svako zainteresovano lice ima pravo prijaviti da udruženje odnosno fondacija ne vrše povjerene poslove, u skladu sa zakonom.

(2) Organ uprave nadležan za nadzor dužan je pismeno naložiti organu upravljanja udruženja i fondacije mjere za uklanjanje uočenih nedostataka, kao i preduzeti druge mjere u okviru svojih prava i dužnosti.

DIO ČETVRTI - PRESTANAK RADA I BRISANJE IZ REGISTRA UDRUŽENJA I FONDACIJE

Član 48. (Prestanak rada)

Udruženje i fondacija mogu prestati sa radom dobrovoljno na osnovu odluke nadležnog organa udruženja i fondacije, navodeći razloge donošenja takve odluke ili po sili zakona pod uslovima utvrđenim ovim zakonom.

Član 49. (Prestanak rada udruženja ili fondacije)

(1) Udruženje i fondacija prestaju sa radom:

- a) ako nadležni organ udruženja i fondacije donese odluku o prestanku rada, odluku o pripajanju, spajanju ili podjeli udruženja i fondacije;
- b) ako se utvrdi da je udruženje ili fondacija prestala djelovati.

(2) Smatra se da je registrovano udruženje i fondacija prestalo djelovati:

- a) ako je proteklo dvostruko više vremena od vremena utvrđenog statutom udruženja i fondacije za održavanje skupštine udruženja, odnosno upravnog odbora fondacije, a skupština, odnosno upravni odbor nisu održani;
- b) ako se broj članova udruženja smanji ispod broja određenog ovim zakonom za osnivanje udruženja, a skupština udruženja u roku od tri mjeseca od nastupanja ove okolnosti ne donese odluku o prijemu novih članova;
- c) ako se broj članova upravnog odbora fondacije smanji ispod broja predviđenog ovim zakonom, a postupak imenovanja novog člana ili članova nije započet u roku od 6 mjeseci od dana prestanka rada člana ili članova;
- d) ako se utvrdi da se na adresi sjedišta udruženja ili fondacije ne provode nikakve aktivnosti udruženja odnosno fondacije 3 mjeseca neprekidno niti je u toku od 3 mjeseca moguće kontaktirati lice ovlašteno za zastupanje udruženja ili fondacije; ili
- e) po pravnosnažnosti rješenja o okončanju stečajnog ili likvidacionog postuka.

(3) Lice ovlašteno za zastupanje udruženja i fondacije dužno je u roku od 30 dana od dana kada je udruženje i fondacija prestalo djelovati u skladu sa stavom (1) tačka a) ovog člana, dostaviti Osnovnom sudu zahtjev sa dokazima o prestanku rada udruženja i fondacije.

(4) Nadležni inspektor pokreće postupak brisanja iz registra udruženja odnosno fondacije u slučaju utvrđenja okolnosti iz stava (2) tačka d) ovog člana.

(5) Lice ovlašteno za zastupanje udruženja ili fondacije, član organa udruženja ili fondacije ili nadležni nadzorni organ će po saznanju okolnosti iz stava (2) ovog člana u roku od 8 dana od dana saznanja za iste podnijeti Osnovnom sudu zahtjev za brisanje udruženja ili fondacije iz registra.

(6) Osnovni sud donosi rješenje na osnovu okolnosti utvrđenih saglasno odredbama stava (1) i (2) ovog člana.

(7) Neće se smatrati da je fondacija prestala sa radom ukoliko se utvrdi da postoje objektivne okolnosti koje sprečavaju pokretanje postupka imenovanja novog člana ili članova upravnog odbora, dok takve okolnosti postoje.

Član 50.

(Zabrana rada udruženja i fondacije)

(1) Udruženju, odnosno fondaciji zabranjuje se rad:

- a) ako djeluje suprotno odredbama iz člana 5. ovog zakona;
- b) ako nakon izrečene prekršajne kazne saglasno članu 56. stav (1) tačka b) i d) ovog zakona nastavi da obavlja djelatnost zbog koje je izrečena prekršajna kazna.

(2) U slučajevima iz prethodnog stava, postupak sprovodi Osnovni sud.

Član 51.
(Raspodjela imovine udruženja i fondacije)

(1) Imovina udruženja i fondacije preostala nakon prestanka rada raspodjeljuje se saglasno odluci nadležnog organa udruženja i fondacije, a u skladu sa odredbama statuta udruženja ili fondacije.

(2) Ukoliko nadležni organ registrovanog udruženja i fondacije ne donese odluku o raspodjeli imovine do dana brisanja iz registra, Osnovni sud raspodjeljuje preostalu imovinu udruženju ili fondaciji, koji imaju iste ili slične statutarne ciljeve.

(3) Imovina udruženja i fondacije ne može se raspodijeliti:

- a) osnivačima;
- b) članovima udruženja;
- c) članovima organa upravljanja;
- d) licima ovlaštenim za zastupanje;
- e) zaposlenima;
- f) donatorima; ili
- g) bliskim srodnicima nabrojanih lica.

Član 52.
(Shodna primjena Zakona o stečaju i Zakona o likvidacionom postupku)

(1) Nad udruženjem ili fondacijom može se provesti stečaj, odnosno likvidacija.

(2) Stečajni, odnosno likvidacioni postupak provodi se u skladu sa odredbama Zakona o stečaju i Zakona o likvidacionom postupku.

Član 53.
(Brisanje iz registra)

(1) Udruženje i fondacija brišu se iz registra na osnovu pravnosnažnog rješenja o prestanku rada udruženja i fondacije, odnosno na osnovu pravnosnažne presude o zabrani rada udruženja i fondacije, saglasno odredbama člana 50. ovog zakona.

(2) Svi relevantni javni podaci o udruženju ili fondaciji brisanom iz registra na osnovu odluke o zabrani rada, moraju ostati dostupni nadležnim organima radi neophodnih provjera u zakonom propisanim postupcima.

DIO PETI – SARADNJA IZMEĐU NADLEŽNIH TIJELA

Član 54.
(Saradnja između nadležne inspekcije i Osnovnog suda)

Osnovni sud odnosno nadležni registar će, na zahtjev nadležnog inspektora, dostaviti informacije iz registarskih isprava ili omogućiti uvid u registarske isprave aktivnog i brisanog

udruženja ili fondacije u slučaju potrebe provjere zakonitosti rada udruženja ili fondacije odnosno provjere ranijih upisa osnivanja udruženja ili fondacija od strane istih lica.

DIO ŠESTI – PREKRŠAJNE ODREDBE

Član 55.

(Novčane kazne od 500 KM do 3.000 KM)

(1) Kaznom u iznosu od 500,00 KM do 3.000,00 KM kazniće se za prekršaj udruženje i fondacija koja:

- a) ne prijavi promjene podataka koji se upisuju u registar u rokovima predviđenim ovim zakonom (član 35. stav (1));
- b) obavlja djelatnosti koje nisu u skladu sa statutom udruženja i fondacije (član 3. i član 8.);
- c) u pravnom prometu ne upotrijebi naziv pod kojim je upisan u registar (član 6. stav (2));
- d) ne upotrijebi dobit ostvarenu obavljanjem privredne djelatnosti i imovinu na način predviđen zakonom i statutom udruženja i fondacije (član 3. i član 8.);
- e) ne podnese izvještaje na način i u rokovima predviđenim ovim zakonom (član 38. stav (2), član 39., član 41. stav (2), član 46.); ili
- f) ne djeluje na adresi registrovanog sjedišta udruženja ili fondacije (član 42. stav (2) tačka a) u vezi sa članom 49. stav (2) tačka d)).

(2) Kaznom u iznosu od 300,00 KM do 1.000,00 KM za prekršaj iz stava (1) ovog člana kazniće se i lice ovlašteno za zastupanje u udruženju ili fondaciji.

(3) Postupak iz ovog člana provodi se u skladu sa Zakonom o prekršajima Brčko distrikta Bosne i Hercegovine.

DIO SEDMI – PRELAZNE I ZAVRŠNE ODREDBE

Član 56.

(Prelazne odredbe)

(1) Udruženje i fondacija koji su registrovani prije stupanja na snagu ovog zakona imaju obavezu da usklade svoje akte sa odredbama ovog zakona, i da registru dostave usklađene akte u roku od šest mjeseci od dana stupanja na snagu ovog zakona.

(2) Postupci registracije koji nisu završeni do dana stupanja na snagu ovog zakona provode se u skladu sa odredbama ovog zakona.

Član 57.

(Stavljanje van snage)

Danom stupanja na snagu ovog zakona stavlja se van snage Zakon o udruženjima i fondacijama Brčko distrikta Bosne i Hercegovine ("Službeni glasnik Brčko distrikta Bosne i Hercegovine broj: 12/02 i 19/07).

Član 58.
(Stupanje na snagu)

Ovaj zakon stupa na snagu osmog dana od dana objavljivanja u "Službenom glasniku Brčko distrikta Bosne i Hercegovine".